

Kapisiliarniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18, 31. oktober 1996-imeersumi, § 5, § 8, § 10, § 10a, imm. 1, § 13, imm. 2, § 23, § 25, § 26, § 33, imm. 2 aamma § 34, imm. 3, ilaatigut Inatsisartut inatsisaanni nr. 6, 20. maj 1998-imeersukkut, Inatsisartut inatsisaanni nr. 5, 21. maj 2002-meersukkut, Inatsisartut inatsisaanni nr. 28, 18. december 2003-meersukkut, Inatsisartut Inatsisaanni nr. 17, 3. december 2009-meersukkut, Inatsisartut Inatsisaanni nr. 12, 3. December 2012-imeersukkut Inatsisartut Inatsisaat nr. 18, 3. juni 2015-meersoq kiisalu kingullermik Inatsisartut inatsisaatigut nr. 28, 28. november 2016-imeersukkut allanngortinneqarsimasut tunngavigalugit aalajangersarneqarpoq:

Kapitali 1

Atuuffia nassuaatillu

Atuuffia

§ 1. Nalunaarut una Kalaallit Nunaata aalisarnikkut oqartussaaffigisaani kapisilinniarnermut atuuppoq:

- 1) Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviusumik killigititamit 40 səmilit avataanni aalisarneq inerteqqutaavoq.
- 2) Kalaallit Nunaata Kangiata aalisarfíni. Paragraffit tulliuttut kisimik atuutissapput, tassalu § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigititamit 12 səmilit avataani kapisilinniarluni aalisarneq inerteqqutaavoq.

Nassuaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq pisat tamaasa ilaannaasaluunniit tuniniarnissaat siunertaralugu kapisilinniarnerut.

Imm. 2. Inuussutissarsiummut atatinnagu kapisilinniarneq nalunaarummi matumani paasineqassaaq nammineq atugassanik kapisilinniarnerut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarnissamut akuersisummik allagartaqartunit toqqaannartumik pisineq tigusinerlu.

Kapitali 2

Inuussutissarsiutigalugu kapisilinniarneq

Inuussutissarsiutigalugu kapisilinniarnermut piumasaqaatit

§ 3. Inuussutissarsiutigalugu kapisilinniarnissamut akuersisummik allagartallit kisimik kapisilinnik tuniniaasinjaatitaapput.

§ 4. Inuussutissarsiutigalugu kapisilinniarsinnaanermut allagartat akuersissutit Naalakkersuisunit tunniunneqassapput.

Imm. 2. Allagartat imm. 1 naapertorlugu akuersissutit qinnuteqartunut piumasaqaatinik makkuninnga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut attuumassuteqavisoq, tak. aalisarneq pillugu Inatsisartut inatsisaanni § 3, imm. 4.
- 2) Qassutinik kapisilinniutinik aamma angallammik kapisilinniummik 12,8 meterit (42 fod) tikillugit tamakkerlugu angissusilimmik qinnuteqartoq nammineq pigisaqartoq.
- 3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartoq.
- 4) Qinnuteqartunut aalisarnerup siuliani akuersisummik peqarsimasunut aalisarnerup siuliani nalunaaruteqartussaaitaaneq pillugu §§ 9 aamma 16 naapertorlugu naammassinnissimassapput, taamaattoq takuuq § 18, imm. 3.

Inuussutissarsiutigalugu kapisilinniarnermi piniutit

§ 5. Uku atorlugit inuussutissarsiutigalugu taamaallaat kapisilinniartoqarsinnaavoq:

- 1) qarsorsat, imaluunniit
- 2) qassutit tasillugit minnerpaamik 140 mm-inik nigartallit atorlugit.

Imm. 2. Qassutit nigartaat uuttorneqassapput uuttuit ½ kiilumik oqimalutserlugu nigartamut ikkunneratigut nakkartinneratigullu. Qimiaa puttalatisisoq atuarlugu nigartat 20-t qimianut ungaseqatigijit uuttorneqassapput. Nigartat tamarmik imm. 1-imí piumasaqaat eqqortissavaat.

Imm. 3. Qassutit kapisilinniutit atorneqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiinermi atorneqartoq imermi allanngujaatsuussaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminut periarfissaat ajornerulerussaajunnaarlugit.

Inuussutissarsiutigalugu kapisilinniarnerup aqunneqarnera

§ 6. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfinnut tuniniarneqartussanik aalisarnertut ingerlanneqarsinnaavoq.

- § 7.** Aalisarnermut § 6 malillugu Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kalaallit Nunaanni kapisilittassanik aalajangersaasassapput.
- Imm. 2.* Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut piffissat ilaannut ataasiakkaanut ulloq aallartiffissaq aalajangertassavaat. Ulloq aallartiffia nuna tamakkerlugu tusagassiutit aqqutigalugit nalunaarutigineqartassaaq.
- Imm. 3.* Inuussutissarsiutigalugu kapisilinnik aalisarneq ulloq aalajangiiffigineqartoq sioqqullugu aallartinneqassanngilaq.
- Imm. 4.* Inuussutissarsiutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.
- Imm. 5.* Inuussutissarsiutigalugu kapisilinniarnermit pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutilu Naalakkersuisut akuersissuteqarnerisigut.

§ 8. Kapisilittassiissutit aalajangikkat tamakkerlugin pisarineqarnissaat qanillippat, Naalakkersuisut nalunaarutigissavaat, qaugu inuussutissarsiutigalugu kapisilinniarneq kiisalu taamatut aalisarnermit pisanik pisineq aamma tunisineq unissanersoq.

- Imm. 2.* Imm. 1 malillugu nuna tamakkerlugu tusagassiutit aqqutigalugit nalunaarutigineqartassaaq.
- Imm. 3.* Aalisarneq unitsinneqarpat, tak. imm. 1, inuussutissarsiutigalugu kapisilinniarneq kiisalu taamatut aalisarnermit pisanik pisiortorneq tunisinerlu inerteqqutaalissapput.

Inuussutissarsiutigalugu kapisilinniarnermit pisanik nalunaaruteqartarneq

- § 9.** Kapisillit pisarineqartut tamarmik Kalaallit Nunaanni Aalisarnermik Akuersissutinik Nakkutilliisoqarfimmut (KANUAANA) nalunaarutigineqassapput.
- Imm. 2.* Tunisat imaluunniit akigineqartut amerlassusii "niaquernagit erlaveerlugin" nalunaarutigineqarpata naatsorsueriaaseq 1,11 atorneqassaaq aalisakkat ilivitsunngortillugit naatsorsorneranni.
- Imm. 3.* Inuussutissarsiutigalu aalisarnissamut akuersissutillit kalaalilimineerniarfinni toqqaannaq tunisisartut tulaassinerit tamaasa nalunaaruteqartassapput. Nalunaaruteqarnermi kapisillit pisat tamarmik ilaatinneqassapput. Pisat pillugit nalunaarutiginninnej nalunaarummi ilanngussaaq 1 atorlugu pisassaaq. Pisat pillugit nalunaarutiginninissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gfk@nanog.gl kapisilinnik tikiussinerit kinguninngua pisassaaq.

Kapitali 3

Inuussutissarsiummut atatinnagu kapisilinnik aalisarnermit pisanik nalunaaruteqartarneq

Inuussutissarsiummut atatinnagu kapisilinnik aalisarneq

- § 10** Inuussutissarsiummut atatinnagu kapisilinniarnissamut akuersissut qinnuteqareernikkut Naalakkersuisunit tunniunneqartassaaq.

Imm. 2. Imm. 1 malillugu allagartat akuersissutit qinnuteqartunut piumasaqaatinik makkuninnga naammassinnittunut tunniussisoqarsinnaavoq:

- 1) Aalisarneq pillugu Inatsisartut inatsisaanni § 8, imm. 1-imí piumasaqaatinik naammassinnissimasut.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaatitaaneq pillugu §§ 15 aamma 16 naapertorlugu naammassinnissimassapput, taamaattoq takuuk § 18, imm. 3.

Inuussutissarsiutiginagu kapisilinniarnermi piniutit

§ 11. Inuussutissarsiummut atatinnagu kapisilinniarneq uku taamaallaat atorlugit piniaqqusaapput:

- 1) qarsorsat, imaluunniit
- 2) qassutit (ataatsit) 2000-inik nigartallit, taakkua tasillugit nigartaat minnerpaamik 140 mm-iusut.
Imm. 2. Qassutit nigartaat uuttorneqassapput uuttuutit ½ kiilumik oqimaalutserlugu nigartamut ikkunneratigut nakkartinneratigullu. Qimiaa puttalaitsisoq atuarlugu nigartat 20-t qimiaanut ungaseqatigijit uuttorneqassapput. Nigartat tamarmik imm. 1-imí piumasaqaat eqqortissavaat.
3. Qassutit kapisilinniutit piginnittut aqqanik nalunaaqutserneqarsimassapput. Nalunaaqutsiinermi atorneqartoq imermi allanngujaatsuussaaq.
Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminut periarfissaat ajornerulertussajunnaarlugit.

Inuussutissarsiutiginagu kapisilinniarnerup aqunneqarnera

§ 12. Inuussutissarsiummut atatinnagu kapisilinniarneq pisassiissuteqarnikkut ingerlanneqarsinnaavoq.

§ 13. Inuussutissarsiummut atangitsunik, tak. § 12, Naalakkersuisut ukiut tamaasa, nunat tamalaat akornanni isumaqtigiiissutit mianeralugit, Kitaani kapisilittassanik aalajangersaassassapput.

Imm. 2. Inuussutissarsiummut atatinnagu kapisilinnik aalisarneq inuussutissarsiutigalugu aalisarnerup aallarteqatigissavaa, takuuk § 7, imm. 2.

Imm. 3. Inuussutissarsiummut attuumassuteqanngitsumik kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutil lugit) kiilunngorlugit taaneqartut, iluanni pisinnaavoq.

§ 14. Kapisilittassiissutit aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigalugu kapisilinniarneq kiisalu taamatut aalisarnermit pisanik pisineq aamma tunisineq unissanersoq.

Imm. 2. Imm. 1 malillugu nuna tamakkerlugu tusagiutit aqqutigalugit nalunaarutigineqartassaaq.

Imm. 3. Aalisarneq unitsinneqarpat, tak. imm. 1, inuussutissarsiummut atatinnagu kapisilinniarneq kiisalu taamatut aalisarnermit pisanik pisiortorneq tunisinerlu inerteqquatalissapput.

Inuussutissarsiummut atatinnagu kapisilinnik aalisarnermit pisanik nalunaaruteqartarneq

§ 15. Inuussutissarsiummut atatinnagu kapisilinnik aalisarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginnineq nalunaarummi ilangussaq 1 atorlugu pisassaaq. Pisat pillugit nalunaarutiginninissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl kapisilinnik qassutit tikiunnerisa kinguninngua pisassaaq, tak. § 11, imm. 4.

Kapitali 4

*Inuussutissarsiutigalugu aamma inuussutissarsiummut attuumassuteqanngitsumik kapisilinniarnermi
pisaqanngitsoornerit nalunaarutigineri*

§ 16. Inuussutissarsiutigalugu kiisalu inuussutissarsiummut attuumassuteqanngitsumik kapisilinniarssamut akuersissutaillit tamarmik kapisilinniarsimanngitsut tamanna pillugu ilangussaq 1 atorlugu nalunaarutigissavaat.

Imm. 2. Inuussutissarsiutigalugu kiisalu inuussutissarsiummut attuumassuteqanngitsumik kapisilinniarssamut akuersissutaillit tamarmik kapisilinniarsimasut tamanna pillugu ilangussaq 1 atorlugu nalunaarutigissavaat.

Imm. 3. Akuersissutinik atorneqanngitsunik pisaqanngitsoornerillu nalunaaruteqarneq nalunaarummut ilangussaq 1 aqqutigalugu pissaaq. Pisat pillugit nalunaarutiginninissaq, ukumi aalisarfiusumi, kingusinnerpaamik decembarip 1-ani uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl

Kapitali 5

Pineqaatissiinerit

§ 17. § 1, nr. 1 aamma nr. 2, § 2, imm. 1, 2. imm., § 3, imm. 1, § 4, § 5, imm. 1, imm. 3, aamma imm. 4, § 7, imm. 3, 4 aamma 5, § 8, imm. 3, § 9, § 10, imm. 1, § 11, imm. 1, imm. 3, aamma imm. 4., § 13, imm. 3, § 14, imm. 3, § 15 aamma § 16-imik unioqqutitsinerit Kalaallit Nunaanni Pinerluttulerinermik Inatsit naapertorlugu akiliisitsinermik kinguneqarsinnaapput.

Imm. 2. Inatsisilerinermi immikkoortut inuttut isigineqarsinnaasut pinerluttulerinermut inatsimmi malittarisassat malillugit imm. 1-imut ilaapput.

Imm. 3. Imm. 1 aamma 2 malillugit suliat Kalaallit Nunaanni Eqqartuussivimmut suliaqartussatut siullertut suliakkiutigineqassapput.

Imm. 4. Akiliisitsissutit imm. 1-3 malillugit pineqaatissiissutigineqartut Nunatta Karsianut pisassanngortinneqassapput.

Kapitali 6

Atortuulersitsineq, atorunnaarsinnejarnissaa kiisalu ikaarsaariarnermi aalajangersakkat

§ 18. Nalunaarut una atortuulissaq 13. august 2018-imi.

Imm. 2. Peqatigitillugu Namminersorlutik Oqartussat kapisilinniarneq pillugu nalunaarutaat nr. 20 9. oktober 2015-imeersoq atorunnaarpooq.

Imm. 3. § 4, imm. 2, nr. 4 aamma § 10, imm. 2, nr. 2-mi piumasaqaatit 2019-imut taakkulu kingorna piffissani aalisarfiusersussani akuersissutinik tunniussiniarnermi atuutissapput.

Namminersorlutik Oqartussat, ulloq 10. August 2018

Erik Jensen

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut